

籌辦夷務始末

籌辦夷務始末卷之五十

同治六年七月庚申山東巡撫丁寶楨奏。捻逆全股搶撲膠萊河防。經官軍擊退。據擒獲賊目李明山供稱。賊中有洋匪二名。勾結洋人百餘名。到勞山口與任賴相見。仍令潛回購辦洋礮等語。查該逆勾買洋人軍火。臣先已慮及。曾函屬登萊青道潘霽。在煙臺嚴加防範。茲據賊供。尤應確查防備。臣卽飛咨各省通商衙門。傳知各國領事。嚴為稽查。並咨登州鎮及飭該道多募師船。分巡海口。嚴查洋匪出入。以杜勾聚。其有海口各州縣。亦飭雇募船隻。派役嚴查。

諭軍機大臣等。丁寶楨奏。捻股搶撲膠萊河。飭經官軍擊退一摺。賊匪購買洋人軍火。最宜防備。著飛咨沿海各省。加意巡查。以杜句聚。

辛酉。總理船政前江西巡撫沈葆楨奏。竊臣於同治五年十一月初一日奉

上諭。左宗棠奏請派重臣總理船政一摺等因。欽此。臣自渥荷生成。優予終制。從未敢一入官署。左宗棠奉

命西征。倉卒見訪。堅以船政相屬。臣知事在必行。自顧材非其任。面辭者四。函辭者三。呈辭者再。且徇本籍士民之意。聯名籲留。左宗棠暫緩去任。原以創造輪船。關係至巨。非其人

莫能勝也。乃蒙

聖主特達之知。采及菲林。畀以重寄。始飭會辦。繼令專司。且感且懼。至於涕零。早夜傍徨。寢食幾廢。誠以臣之材望。迥非左宗棠之比。而所處之地。又各不同故也。洋人之性。善疑。非其素所信服之人。動生猜忌。日意格。德克碑。久隸左宗棠麾下。其公忠果毅。親見之而習知之。固宜為之盡力。臣於二將。無一面之識。其難一也。輪船經費。與別項軍需不同。稍不應手。便礙大局。從前所估。祇屬大概。數月以來。覈計應辦工程。應發款項。便有從前未經議及者。出款稍溢。使苦不敷。至於成船之後。一船又有一船之經費。非放開眼

界通盤籌畫。雖竭帑藏不足以供之。且以迂拙之才。處桑梓嫌疑之地。其難二也。紳受治於官者也。為所治者。忽然與之並列。其勢必爭。咸豐年間。設團練大臣。選巨紳之有鄉望者為之。然獲咎者往往而有。未見成功者。蓋互相推諉。則事不行。互執己見。則事又不行。構隙甚微。頓成冰炭。雖封疆大吏。均公忠體國。而權勢所在。媒孽者多。下至胥隸。皆足以簸弄是非。其難三也。官之於民。有分以相臨。故威則知懼。恩則知勸。紳與士民等耳。不任事猶可也。任事則親故滿前。恩威俱窒。所求不遂。謗語橫生。且自束髮受書。及官成歸里。頗不見惡於鄉黨。乃奉

命之日。薦書盈篋。戶為之寒。舌敝唇焦。立成怨府。匿名揭貼。倡自官場。寢為風俗。輒思搖撼大局。以快其志。於臣何所加損。然而人心世道之憂也。其難四也。欲速則不成。惜費則不成。其理顯而易見。然費數百萬帑金。責效於五六年之後。人人以利藪相窺。一處脂膏。使思自潤。先飽私橐。貽笑遠人。非以法痛繩之。卽轉相仿效。其難五也。外國可法之事。無多。而製器之工。實臻神妙。其人非有聰明絕異之質。但此精益求精。密益求密。不以見難自阻。不以小得自足。此意正自可師。內地工匠。專以偷工減料為能。其用意卽已迥別。故不患洋人教導之不加。而患內地工匠向學之不

殷○非峻法以驅之○重賞以誘之○不足以破除其相沿之痼
習○其難六也○日意格德克碑○功成之日○既獲厚利○又得重
名○名利所歸○妒之者眾○求分其利○求毀其名○皆在意料之
中○稍涉游移○則前功盡棄○左宗棠威望足以鎮之○非臣之
所及也○其難七也○具此七難○何敢輕率從事○惟念時事多
艱○

皇太后

皇上且旰食宵衣○焦勞中夜○若為臣子者○狃於避謗遠罪之私智
何以上答

高厚鴻慈於萬一○臣所深恃者

諭旨諄切知自強之道斷自

衷衷以萬不得已之苦心創百世利賴之盛舉必不為浮說所搖
但願共事者體

朝廷之心為心勿以事屬創行而生畏難之見勿以議非己
出而存隔膜之惡則大功之成拭目可俟矣船廠根本在
於學堂臣訪聞所派教習咸能認真講授生徒英敏勤慎
者亦多其頑梗鈍拙者隨時去之有蒸蒸日上之勢惟馬
尾船廠洋樓一切工程去城較遠監工員紳呼應不靈匠
役不無延緩臣函屬前署藩司船政提調周開錫先行親
赴工所催督一次現在工程亦漸有端緒可以無誤事機

周開錫一腔血誠不避嫌怨視公事如家事為船政中必不可少之人現在病已就瘥與臣常川住局可以隨時相與講明而切究之聞日意格已將機器購齊料理下船約計七月間可到福建候補道船政提調胡光墉將左宗棠餉事安置妥貼亦可來閩臣於本月十六日釋服十七日往晤福州將軍臣英桂閩浙總督臣吳棠福建巡撫臣李福泰後即駕輪船駛至馬尾工次恭設香案望

闕叩謝

天恩敬謹任事遵

旨刊刻木質關防文曰總理船政關防即日開用一切辦理情形

容俟詳細察覈會商隨時奏請

聖裁

諭軍機大臣等。前因左宗棠奉命西征。特令沈葆楨總理船政。茲據沈葆楨奏報任事日期。並懇陳各情。覽奏具見誠惻。船政事宜。本非旦夕所能奏效。左宗棠以事當創始。專摺請派。其知該前撫者。實深該前撫清慎之懷。中外共見。朝廷因事擇人。亦期任事者以朝廷之心為心。並非浮言可奪。該前撫現已任事。惟當勉為其難。卽著督飭周開錫等實力講求。並將日意格等加意籠絡。庶觀成有日。用以自強。毋得瞻前顧後。有誤鉅工。沈葆楨以本地紳士督辦船政。必須地方大吏聯為一氣。呼應始靈。

英樸吳棠李福泰務當和衷商辦俾該前撫永無掣肘之虞其
應需經費並著英桂等隨時經理以竟全功

癸亥三口通商大臣兵部左侍郎崇厚奏。等接據山東撫
臣丁寶楨密函。擒匪在萊陽鋸伐大樹多件。狡謀圖逞。已
飭登萊青道雇備師船放洋巡緝。並據前敵平字營獲到
長髮老賊李明山供稱。該匪在湖北擄有洋人二名。行至
卽墨縣勞山地方。匪眾令洋人潛赴海口。旬來黨夥百餘
託其購買槍礮等語。等查該匪被偏入山。急圖竄逸。既有
重兵扼截歸路。難免鋌而走險。詭設渡海之計。登州各屬
口岸甚多。居民大半養船為業。設該匪盤踞海濱。或搶掠

船隻或勾結匪徒一經入海南則江南山東北則奉天直隸沿海各口處處防不勝防雖經丁寶楨飭備師船誠恐難資緩急伏查上海曾設捕盜輪船從前護送南漕來京李亦曾親見其船實屬堅固迅捷若此時撥給數隻挑選得力將弁備齊礮位駕駛北來分巡登萊各海口梭織盤查遇有該匪搶掠船隻即可隨時轟擊較之內地水師船隻自必倍形得加相應請

旨飭下該省督撫飛飭蘇松太道應寶時迅將現有滬局捕盜輪船酌撥二三隻派令得力將弁多帶洋礮駕駛前赴煙臺交登萊青道潘蔚就近調遣沿海緊要口岸分撥梭巡往

來偵探嚴防該匪入海應需餉糈軍火卽由上海寬為籌備毋令缺乏至獲到該匪所供洋人黨夥購買槍礮各語雖未必實有其事不可不密為防範除天津海口隨時密查外○欸現已飛飭山海東海兩關監督照會各國領事並剗行稅務司一體嚴查以杜私販而昭慎重

諭軍機大臣等○景厚奏嚴防捻匪搶掠海船等語東省水師船隻為數不多且恐未能堅實上海所設捕盜輪船堅固迅捷素稱得加著曾國藩速飭應實時多撥船隻挑選得力將弁配齊礮火駛赴煙臺一帶交丁寶楨督同潘霨就近調遣

丁卯總理各國事務恭親王等奏六月十七日內閣奉

上諭給事中周星譽奏理財用人宜量為變通一摺著該衙門議奏欽此由軍機處鈔交到臣衙門臣等查原摺所陳增官制欽商權廣人材三條其前二條係吏戶兩部事件應由該衙門各自議奏末一條專論洋務係臣衙門事件臣等詳加閱看該給事中奏稱內而總理衙門外而通商大臣必當同時大開幕府廣求奇士有殊絕於人者皆羅致幕下必使我足以弱夷之勢夷不能困我之材而且西人之舉動不可告人者我得而先知之先制之等語意在造就人材以達外國之情而強中國之勢惟辦理洋務與別事不同有未可以常格拘者卽如招考天文算學臣衙門何嘗不

欲於此中隱求良士以資臂助而急切尚難見功況近今
所謂人才有實學亦有虛聲其有實學者往往高自位置
不慕榮進卽如上年郭嵩燾所舉邵伯奇李善蘭二員奉
旨飭令來京至今引疾不赴其究竟有無實學抑或恐為浮言所
鄙不肯輕進無從而知至於純盜虛聲之人考其言則是
詢其事則非等而下之以至一技一藝之長駁雜不純驟
難鑑別是該給事中所稱大開幕府廣求奇士辦理甚屬
不易臣等耳目未廣延攬難周該給事中請

飭交臣衙門暨海疆督撫各口通商大臣一同悉心妥議應如所
請懇

恩飭下沿海各督撫南北洋通商大臣悉心妥議將是否可行之處奏明候

旨定奪再該給事中又稱償以事涉更張則請就上海甯波兩口先行試辦等語且等查上海廣東各口設有同文及廣方言館學習外國語言文字藉以儲養人才業經開辦有年此時究竟有無成效曾否於其中造就得人應令該督撫等詳加考覈據實奏

聞其各館章程如尚有未盡事宜應再酌覈以廣撙節而資佐理均令一併妥議覆奏

御批依議

恭親王等又奏再前據廣東巡撫郭嵩焘奏南海生員郭伯奇專精數學海甯縣生員李善蘭淹通算術尤精西法宜並置之同文館以資討論等語同治五年八月奉

上旨著瑞麟蔣益澧馬新貽迅將郭伯奇李善蘭咨送來京聽候考驗等因欽此行知各該督撫遵辦在案嗣據兩廣總督瑞麟奏

據郭伯奇稟稱向有肝病時常苦痛屢醫未痊實難領咨赴京俟該生醫調全愈再行咨送又據浙江巡撫馬新貽咨據李善蘭稟稱病雖稍痊精神委頓難勝舟車之勞惟乞不定限期俟病勢脫體報

國有日等語臣等查該生員郭伯奇等因病未能急切就道

自屬實情。惟該生等據郭嵩燾保薦均係熟精數算。現在同文館添設學習天文算學一館。該生等到此駕輕就熟。正好與所延西洋教習及考取學習各員討論切磋。以期互有進益。現距該生報病之日為期已久。自必調治就痊。相應請

旨飭下兩廣總督廣東巡撫浙江巡撫。迅即剴切曉諭生員鄒伯奇。李善蘭務宜仰體

朝廷需才孔亟。作速束裝北上。力圖報效。以副

國家作養人材之意。

御批依議

壬申福州將軍兼管閩海關稅務英桂閩浙總督吳棠福州
建巡撫李福泰奏臣等伏思設廠製造輪船係中國自強
之道當今應辦急務莫要於此凡有血氣之倫無不樂觀
厥成爲百世利賴之計前以沈葆楨尚未釋服任事先在
省城設立船政總局派委司道隨時稟商經理其事所需
經費節經臣英桂先將海關結款四十萬兩撥解嗣自上
年十二月起至本年六月將每月銀五萬兩按月籌撥共
計銀七十萬兩先後解由藩司轉解應用臣吳棠臣李福
泰均於本年三月到閩未得與左宗棠接見講求節次往
晤沈葆楨面談一切並以臣等初莅閩境現在建造船廠

洋樓之羅星塔地方。未經親歷其地。臣吳棠先於五月初旬。乘舟前往。周歷勘視工程。稍有端緒。查知學堂教習洋師。均能認真講授。並詢之該洋師云。生徒資質尚多敏慧。臣李福泰亦於本月十七日。會同沈葆楨前往履勘。現聞日意格所購機器。六月開料理下船。計卽可以趕運到閩。此時沈葆楨親駐工次。更可無誤事機。臣等惟有協恭和衷。愚忱共矢。欽遵。

諭旨隨時會商辦理。所需經費。由臣英桂按月撥解。斷不敢稍有延誤。以濟要需。

御批知道。

閩浙總督吳嵩福建巡撫李福泰奏竊據臺灣鎮總兵劉
明燈臺灣道吳大廷稟稱准合眾國住廈李領事照會該
國商船名羅妹於外國本年三月十二日即中國二月初
七日行至臺灣南洋港面閩礁受傷打破該船主及其妻
並第二夥長水手三名下杉板登岸約離打狗口一百五
十里之遙被該處之人戕害止有華水手一名脫逃又第
二號小船一隻內載夥長並水手七人登岸料亦被害請
嚴查究辦如尚未盡被害查明送交又准該國亞士休落
總兵官費米日照會等因並稱定必以力相幫辦理此案
先是接准英國領事賈祿函致本月初八日有夾板船一

號駛至瑯瑯洋次紅頭嶼衝礁擊碎船中夥計十四名駕杉板逃生至瑯瑯尾龜仔角鼻山登岸被該處生番捉殺十三人僅存一人來至貓仔坑莊車城街經瑯瑯匠首人等將船夥一名發配貨船來旂交敵署收領各等情當經臺灣道吳大廷函復賈領事並檄鳳山縣會營設法查辦厥後李領事賈總兵至臺與吳大廷接晤經該道將臺地生番穴處狃居不載版圖為聲教所不及是以設有土牛之禁今該船遭風誤陷絕地為思慮防範所不到苟可盡力按捕無不飛速檄行無煩合眾國兵力相幫辦理或損威失事愈抱不安剴切開導該領事等均各允服樂從現

仍再飭鳳山縣會營查辦各等情前來查此案先據李領事來省面見臣吳棠述知前事當因未據鎮道稟報卽飭令通商局司道密函飛布臺灣道趕緊確查委辦去後旋據稟報各情復經臣等飭行臺灣鎮道查辦隄防萬一再有外國人船驟到生番地界停泊務必設法勸阻弭患事先並咨呈總理衙門查照在案嗣據臺灣鎮道五月初二日來詳據鳳山縣知縣吳本杰會同南路營參將凌定邦前署鳳山縣知縣凌樹荃等查稟龜仔角地方去邨崎尚有數十里其地盡係生番並無通事烏道羊腸菁深林密係在生番界內其行劫之兇犯又係生番並非華民該處

既未收入版圖且為兵力所不及委難設法辦理並據聲
明業已照會李領事查辦旋又據該鎮道鈔錄五月二十
四日奏彙呈報五月十二日花旗國輪船駛赴傀儡山之
龜仔荳社有二等帶兵洋官一員洋兵一百七十八名被
生番詐誘上山從後兜擊因路徑險窄帶兵官受傷斃命
洋兵被傷者數人輪船已於十三日駛回上海聲言回國
添兵秋冬之間再來勦辦等情臣等接據詳報不勝詫異
正在檄飭設法妥辦聞據英國稅司美理登代送合眾國
李領事申陳以該鎮道始則允為辦理不必外國相幫繼
則謾諸地非中國兼轄為兵力所不及似可置不與較謂

為前後異議語多悃囑而其五月十二日輕進失挫一節諱而不言。臣等伏思瑯瑤傀儡山一帶地屬番境該處之不易進兵番人之難以理喻此固人所共知。即外國人亦未必不知。此次合眾國商船因遭風誤陷絕地臺灣鎮道劉明燾吳大廷等於據報後即經派委文武查辦剴切開導告以該處不可進兵允飭地方官設法不必外國相幫深得大體。即其奏稱密約熟番乘閒代謀等語亦屬得法。而其照會李領事等之文則以委難辦理之語決絕覆之。致令有所藉口。在該鎮道之意似欲使其知難而止。中外交涉事件必須計出萬全縱係實在情形亦不得不曲示

包容周顧大局。今該商既被擒殺多名。又有兵船挫失之事。斷不肯置不與較。一經與番人構釁。則臺地動多牽掣。自應趕緊設法籌辦。不容以推諉而生枝節。現經臣照覆李領事等。允為查辦。並嚴檄責成該鎮道會督文武。遴選屯弁屯兵。雇覓熟番。購綫辦理。暨查有前署臺灣鎮總兵曾元福。於該處情形最為熟悉。委署臺防同知王文啓。前在嘉義任內。深得民心。檄派令隨該鎮道相機妥籌。務將滋事之兇番緝獲懲治。一面查起被害洋人屍身交領。以仰副

聖朝柔服遠人之至意

御批該衙門知道

丙子科布多參贊大臣奎昌辦事大臣明瑤奏本年五月初十日接准署伊犁將軍參贊大臣榮全咨到奏案內開該大臣親往俄國收攬索倫等眾如若帶往科城卽將該索倫等分撥烏科兩處撥給牧地令其暫行棲止等因當經等繕譯通行科屬各部落飭查有無閒地能否安頓此項索倫蒙古人等務為查明迅報以備轉咨去後旋據杜爾伯特土爾扈特扎哈沁和碩特烏梁海明阿額魯特等旗盟長貝子王公扎薩克散秩大臣總管等報稱各查得遊牧內均是戶口日繁遊牧狹窄又兼近年以來亢旱

災疫。牲畜倒斃。人多凍餓。今蒙飭令擇選閒地。安置索倫人。暫行棲止。各旗實係無法分撥遊牧之處等情。相繼稟報前來。等查科布多所屬各旗。皆係荒陬小部。素不豐饒。更兼多有戈壁不毛之地。實與他部遊牧沃野草茂不同。今據該盟長等所稱無地安插。此項索倫蒙古人。洵屬實情。若欲勉強安置。將恐地不足以養人。貧則無以安生。復患亦非淺鮮。除等咨行該署將軍。榮全另籌妥策辦理外。理合附片奏聞。

御批該衙門知道

諭軍機大臣等。前因榮全奏籌畫安插索倫等語。當諭令該參贊

於接出後令在科城暫住再行酌量請旨茲據奎昌等奏稱科布多所屬各旗戶口日繁游牧狹窄又兼近年亢旱成災疫氣流行牲畜倒斃人多凍餓實無閒地安插索倫人眾請飭榮全另籌妥策等語奎昌等所奏雖係實在情形惟此項人眾若非籌給牧地令其暫行棲止必至淪落堪虞仍著麟興榮全錦丕勒多爾濟奎昌明璠在烏科兩城暫為設法安插俾該索倫人眾到時得有棲身再另行會籌善策妥速奏聞以為永遠安插之計李雲麟當與麟興等悉心會商擇地安置毋令人眾流離失所

乙卯烏里雅蘇台將軍麟興參贊大臣錦丕勒多爾濟奏

據扎薩克圖汗部落副將軍車德恩敦多布多爾濟呈報
今因依嚕固果勒察幹克爾濟地方本年六月十八日有
長髮異服步行男女六人不知從何而來詢問不通語言
無憑查考相應拏獲呈報護送前來拏等當堂提傳查其
形狀有似俄人卽由戍守兵內選有大概通曉俄語之人
令其詳加訊問據稱問得一男名西畢哩道那年三十三
歲一婦伊妻阿那年三十三歲女瓦爾瓦爾年七歲女瑪
的哩留那年五歲又一男名米的哩年二十二歲一婦伊
妻鄂噶斐音年二十七歲均係恰克圖附近居住俄人因
向西探親失迷路徑誤入蒙古地方所過之處不知何名

是以被執等語。伏思烏里雅蘇台向不與俄夷通文交易，並無深曉俄語之人。今雖訊取大概供詞，殊難憑信。究不知該俄夷因何越界，是否誤來。值此不靖之時，奸良誠不可辨。再四詳查，從前僅有拘獲俄羅斯人來，均就近解交庫倫查辦在案。今仍遵舊制，即將該俄夷男婦女共六人護解庫倫，咨交該大臣等查收，說明徑送原籍。

御批該衙門知道。

八月乙酉，總理各國事務恭親王等奏。同治六年六月十八、七月二十一等日，由軍機處交出臺灣鎮總兵劉明燈、閩浙總督吳棠等先後奏報，美國商船至臺灣南洋港，聞

礁受傷打破該船主及其妻並第二夥長水手三名下杉板船登岸被該處之人戕害等因具奏前來均奉

旨該衙門知道欽此臣等查此案前於三月十九日據美國使臣蒲安臣呈遞臣衙門照會內稱美國船一隻名羅發被颶風吹觸海礁以致沈沒水底船主與水手共十四人一齊登岸忽有一羣土匪突出將十三人全行殺害請速為查辦並稱連知本國水師提督派兵船到臺灣會辦當經咨行該省督撫轉飭迅速查辦嗣據覆稱業經向該領事官劉切開導均各允服樂從撤兵回廈似其心已輸服別無轉轍復經臣等致函密詢閩省督臣該國輪船究竟行駛

何處應轉飭該鎮道密速查覆務令設法調停免滋事端並告以生番雖非法律能繩其地究係中國地面與該國領事等辯論仍不可露出非中國版圖之說以致洋人生心等因各在案茲據吳棠等奏報前情臣等伏思生番匿處窮山林深菁密即使帶兵勦辦非有熟悉路徑者為之引進亦不易得手儻該國果於秋冬閒帶兵而來此時更難阻其不往設使洋人受挫則生番之滋擾益甚若生番被挫則洋人難保不別生覬覦之心辦理更形棘手今吳棠擬令雇覓熟番購棧籌辦尚為得法惟事經該督等照會該領事等尤為查辦儻所派文武委員及鎮道等不能

豫為熟籌妥辦。連延日久。必致晚漬不休。臣等公同商酌。應請

旨飭下閩浙督撫。嚴飭該鎮道及所派文武委員。迅速購覓熟番。相機辦結。不得任令顛預支飾。庶美國無所藉口。而別費亦可不生。

御批依議

美國照會

為照會事。照得廈門領事官李於二月二十七日咨稱。美國商船之水手華人。到臺灣府港口。稟知英國領事官云。伊先十餘日。坐美國船一隻名羅發往牛莊。未開船三兩

日忽被颶風吹船。船觸海礁。以致沈沒水底。船主與水手共十四人。坐三板往臺灣極南之海。既早。聆其音名彭流。十四人一齊登岸。彼時困憊之極。忽有一羣土匪突出。將十三人全行殺害。該水手卽行躲避。逃至臺灣港口。英領事署稟明等語。英領事立刻偕該水手坐兵船一隻往該地方查驗。或生或死。兵船主駕兩隻三板。甫到海濱。尚未登岸。忽見叢林中放出許多弓箭。鳥槍。止傷一人。而被害之十三人所乘之三板。置在沙岸。形跡顯然。可見該兵船回至臺灣府。本領事風聞此事。亦往驗過。等因。前來。本大臣因思此等兇惡之徒。連殺十數命。復逞兇施放箭槍。實

屬難容而且臺灣極南之海股係險隘之區歷年以來往來船隻遭難者不少務使該處無危險之虞為此照會貴親王請速行知該地方官本大臣隨即通知本國水師提督派兵船到臺灣府與

貴國官相商前往該地方查辦可也

給美國照會

為照覆事准貴國大臣照會內稱以美國羅發商船在臺灣府彭流地方被土匪殺害船主人等十三人經領事官查驗形跡顯然請行知該處地方官查辦等因本爵查遭風洋商逃至臺灣府所屬彭流地方其因憊情形自屬可

憫竟被該處慘殺多命。迨經英領事官前來查驗。又有施放槍箭。拒傷一人。亟應嚴拿懲辦。以儆兇暴。而安商旅。惟查臺灣所屬有地名澎湖海基紛歧。今貴大臣所稱彭流地方。是否卽是澎湖。其滋事之匪。究在何處。均須飭該處地方官確切查明。以憑覈辦。本衙門現已將貴大臣照會鈔錄。飛咨閩浙總督。福建巡撫。嚴飭該地方官趕緊查辦。務將該匪設法辦理。俾商旅得以暢行。除俟該督撫覆到。再行知照外。相應先行照覆。貴大臣查照可也。為此照覆。庚寅三。口通商大臣兵部左侍郎崇厚奏。上年冬間。經總理各國事務衙門奏准。在於廣東輪船變價項下。先行提

撥銀八萬兩。由丹國領事官密安士。倩人赴外洋採辦機器。雇覓西匠。來津設局製造火藥等項。已將籌辦各情先後奏明在案。頃據密安士面稱。現接英國來信。所有製造火藥銅帽機器。均已買妥。共用二萬一千餘金磅。費銀約七萬餘兩。應雇大船三隻。運送來津。每船需雇價三千餘金磅。共需船價約三萬兩上下。又因機器多係重大之物。不能裝入船艙。其內艙空處。擬用別物壓載。英國煤斤用作機器。甚為合用。而較中國煤價值又廉。應買煤一千數百噸。壓載前來。兩得其便。尚應匯一萬金磅前去。計數銀三萬三千三百三十三兩三錢三分。以便照辦等語。自應

如數補給現經彙再於洋稅藥釐兩項下撥給銀三萬三千三百三十三兩三錢三分交密妥士兒收匯寄購辦又據教練京營馬隊之總教官英人薄郎論及查有修造槍礮並仿製炸子開花礮等機器可以在上海香港各處就近採辦並延得英人狄勒前來先行試辦茲已陸續撥銀數千兩購運來津在於城南設局經德椿督同委員添蓋房屋安置各種機器如能仿造合式亦可隨時製辦應需款項一俟購齊由彙彙明價值數目並洋人薪工匠役工價彙彙各報總理衙門查覈理合附片陳明

御批該衙門知道

庚子

盛京將軍都興阿奏准山東巡撫咨開據擒獲賊目李明山供稱賊中有洋匪二名。句結洋人百餘名。到勞山口與任賴相見。仍令潛回購辦洋礮等語。正在覈辦。聞據金州協領同知詳報。七月十三日。有洋人二名。從旅順口下船。十五日進城。詢據一名羅依。一名賈來。由山東煙臺至此。前赴營口洋行賣貨。拘驗洋人。並無領事地方各官印信執照。僅有洋字一張。均不認識。每日在該兩署喧鬧索要車馬盤費。該協領等恐其滋生事端。發給盤費雇小車一輛。會派兵役。於十八日照護送赴營口。該洋人又要騎馬隨

卽出城北行不容拉勸追回賈來一名旋經派出兵役訪至復界瓦房店將羅依一名巡獲帶回均已先後呈送兵備道衙門飭交外國領事官訊辦伏思山東捻逆既有洋匪多人在內勾結購辦洋礮則是由東到奉洋人羅依等二名形蹤詭密並無執照難免不係使出窺探之人惟該協領同知已將伊等呈送海關道署轉交收辦應由該道照會領事官員認真查究以杜影射勾結之漸

御批拏獲無照洋人二名卽著檄令該道會同外國領事官妥為辦理仍著都興阿等督飭官知嚴密盤查毋任奸匪漏跡

庚戌總理船政前江西巡撫沈葆楨奏竊臣於六月十七

日馳赴馬尾蒞事。素經奏明在案。隨接見在事員紳咨詢一切。並駕輪船周覽上下形勢。知馬尾一區上抵省垣南臺水程四十里。下抵五虎門海口水程八十里。有奇。自五虎門而上。黃埔壘。汴。雙龜。金牌。館頭。亭頭。閘。安。皆形勢之區。而金牌為最要。自閘安而上。洋嶼。羅星塔。烏龍。江。林。浦。皆形勢之區。而羅星塔為最要。馬尾地隸閩縣。據羅星塔之上流。三江交匯。中間港汊。旁通長樂。福清。連江等縣。重山環抱。層層鎖鑰。當候潮盛漲。海門以上。島嶼皆浮潮歸。而後洲渚礁沙。縈迴畢露。所以數十年來。外國輪船夾板船。常泊海口。非土人及久住口岸之洋人。引港不能自達。

省城道光末年地方大吏籌備海防但載石鑿舟以塞林
浦上流竟割重重天險而棄之臣詢之海濱土人至今猶
共以為非策也船塢在馬尾山麓地曰中岐但就其一方
地勢而言大江在前迤南而下羣峰西拱狀若匡牀中間
坦處舊本村田去年購買歸官始圍為船塢計地周圍四
百五十丈有奇客冬以來召集民夫窪者平之低者壘之
慮田土之積弱難勝也沿塢密釘木椿以固之慮海潮豁
汎不時驟至也沿塢各增五尺以防之塢外三面環以深
濠既藉通運載之船亦可瀉積淤之水塢內濱江者為船
槽若鐵廠輪廠機器之廠斲木之廠架木之棧房皆參列

其後餘尚有從前未經商定之件宜俟洋將到閩續行分別籌商措置。塢外之東迤北為臣及辦事各員紳公所外國匠房三十間。周以執垣如隣之次。外國匠房之左為法國學堂。後綴生徒下處三十間。其制略如匠房之式。又左為英國學堂。其生徒下處同之下近江湖則煤廠在馬上倚山麓則中國匠房在焉。循麓上山之左肋可以眺遠。臣飭前駐楚軍五百人。因地築壘。不特可攬船廠全局。沿江上下數十里。風帆沙鳥。如在几前。稍下則監督日意格所居也。在臣公所之右者。有外國醫生寓樓。匠首寓樓。其與日意格山樓對峙者。則副監督德克碑之屋。下為官道。將

抵口岸。畫為官街。以便民間貿易。一切土木。或已經完工。或已有三四分至八九分不等。辰下春錨兩集。斤斧雲從。計日課功。屈指可數。此船塢內外之大概情形也。臣又維船政根本。在於學堂。因於六月十九日。就馬尾甄別法學藝童。隨及英學藝童。既因其勤惰。分別升降。復定章程。每日常課外。令讀

聖諭廣訓。孝經。兼習論策。以明義理。其續招入局者。先局門考核。擇其文理明通。尤擇其姿質純厚者。以待教補。蓋欲習技藝。不能不藉聰明之士。而天下往往愚魯者。尚循規矩。聽明之士。非範以中正。必易入奇衷。今日之事。以中國之心。

思通外國之技巧可也。以外國之習氣變中國之性情不可也。且浮沈險薄之子必無持久之功。他日於天文算學等事。安能精益求精。密益求密。謹始慎微之方。所以不能不講也。採辦一節。似易實難。不患美材之難求。而患人心之苟且。向來官場氣習。以浮冒搪塞為能。船政之興。尤視為利藪。去年以來。承辦銅鐵木料煤炭者。非無其人。然用商賈有時擾累之弊。甚於官司。用官司有時侵漁之端。甚於商賈。馴至劣幕奸胥。交通市儈。鬼蜮叢生。是以民間置貨尚有精良。一屬公家。便多賈鼎。明知國帑之當重。竟敢於廢國帑。明知要工之不可謁。竟敢於誤要工。言之實堪

痛恨。臣適又聞向來外國船材煤炭多運自緬甸暹羅。現雖遣員先於近處採辦。他日恐不免取材荒裔。重洋遼迥。更防不勝防。任非其人。糜費雖多。仍歸無用。擬奉此發令之初。明罰勅法。以警其餘人心。畏法而後弊實可除。良材畢至也。至船廠之興。固須收羅工匠。輪船下水。則舵工水勇缺一不行。非徒習慣風濤。尤須熟精槍礮。蓋

國家之初造輪船。譬諸千金買駿。僕衝鋒陷陣。不持寸鐵。雖有千里之馬。安足成功。現在洋匠尚未至閩。船成尚需時日。擬先調閩中舊礮船十隻。添練水勇二三百名。未成船以前。藉以巡緝近洋。成船以後。即可操甲登舟。駕輕就

熟此臣近日考校學堂分飭採辦及招募水勇之情形也
至製造工程俟日意格等分載工匠輪機到廠後再行具
奏除繪圖咨呈軍機處總理衙門外理合先將大概情形
謹會同陝甘總督臣左宗棠福州將軍臣英桂閩浙總督
臣吳棠福建巡撫臣李福壽恭摺由驛具奏

御批覽奏察看海口及船塢大概情形尚屬周密事屬創造該大
臣卽當力任其難妥籌辦理以杜流弊而收實效圖留覽

九月乙丑總理各國事務恭親王等奏竊自外洋各國議
款以來於今十載辦理一切事務其綱領雖挈之於內而
實則行之於外必須在外處置合宜而後得勢得機在內

不煩言而自解本年五月臣衙門因原議十年修約為期已近奏請

飭下南北洋通商大臣於熟悉洋務各員中每處選派二員於十月咨送來臣衙門以備查詢仰蒙

俞允當經恭錄

諭旨並鈔摺行知遵照在案惟前奏止欲於選派各員內收羣策羣力之效而於通盤大局尚待次第籌商上年十二月臣等函致上海通商大臣李鴻章屬令校閱舊案將條約詳為覈校旋據覆稱來歲換約必厚集其勢以求大遠所欲至於應如何防備如何規畫尚未論及又函致兩江總督

曾國藩令將覈定條約寄臣衙門為思慮豫防之計。迄未
登覆。竊思經理洋務關係安危。若非洞達情形。不能得其
要領。各國中財力以英為最強。其所重在通商。性情以法
為最悍。其所重在傳教。俄則善柔陰狠。時時注意於邊界。
三者鼎峙。而其餘羣相附和。總不外乎惟利是圖。臣衙門
與為周旋。恃筆舌以爭之。實恃理勢以折之。然勢有時藉
理而伸。理亦有時因勢而屈。事多棘手。端在於此。溯自道
光二十年以後。辦理夷務。一次不如一次。逮至咸豐十年。
戰守兩窮。於無可如何之中。為萬不得已之舉。參稽眾論。
維持大局。定議與各國互換條約。其時事在倉卒。更無別

策可為

國家立紓禍患僅恃聊作羈縻豈能必復舊觀從容駁正然
昔日允之為條約今日行之為章程臣等即遇事竭力挽
回亦不過百分中之一二比來各國駁駁乎於條約外多
方要索臣衙門但可據理辯駁無論如何曉諭總不輕易
允行即如請

覲遣使銅綫鐵路以及內地設行棧內河駛輪船並販鹽挖煤各
省傳教而橫生枝節等事皆其處心積慮志在必遂者平
日屢次饒舌均經堅持定議再四折辯未肯稍涉依違惟
轉瞬修約屆期臣等私衷揣度彼必互相要約羣起交爭

甚至各帶兵船希冀脅制務滿所欲若不允准無難立啟
釁端然而臣等仍有所恃而不恐則以辦理洋務其綱領
雖在內其實事仍在外彼此同肩斯任尚可據為之計互
相詢謀也濱海沿江將軍督撫及南北洋通商大臣懋膺
朝廷股肱心膂重寄經理有年一切情形無不閱歷當此重
修條約凡彼所覬覦要挾為我所必爭者諒亦思之至熟
先事應如何籌備臨事應如何折衝在臣等朝夕圖維斷
不存推諉之見而同舟必思共濟若不遂處互相籌議是
國家如此重大事務臣衙門獨行己意於理既有所不可於
事亦有所不宜方今各將軍督撫大臣上體

宵旰之勤求下顧商民之生聚斷不肯如昔年之廣東談諸上海
上海談諸天津及至事變已成袖手旁觀自幸其置身局
外惟現在各國使臣久住京師此次議約自必廣集都城
並無廣東上海之展轉各處離京較遠勢不能臨期商榷
而現時應議之事即各處應辦切己之事疑難在外固當
補救於內艱鉅在內尤當匡助於外返觀互證彼此諒有
同心臣等逆料各國來歲種種不情之請必將紛至沓來
但使無甚關鍵仍當酌度權宜償或萬不可行斷無遷就
之理縱至決裂亦非臣等所敢游移然決裂而不壞為之
備不可也決裂而不共為之備尤不可也自古中國與外

國聯和從無善策。況今日外國偏處於中國都城而又濱海沿江要害之區。節節盤踞。實為創局。此時兵力財力兩有不逮。早經外國人暗中覷破。即使臣等駕駛難保不啟戎心。此等情形。又與咸豐十年迥異。非特臣等知之。在外諸臣亦莫不知之。要當合力齊心。共圖良策。所有豫料各國必來爭執之請。

覲遣使銅綫鐵路。以及內地設行棧。內河駛輪船。並運鹽挖煤開拓傳教等節。臣等擬先備具條說。密切函寄各該將軍督撫大臣。屬令妥為悉心籌畫。其究應如何辦理之處。相應請

旨飭下盛京直隸兩江閩粵湖廣江蘇江西浙江山東各將軍督撫及南北洋通商大臣各抒所見至前江西撫臣沈葆楨現在總理船政亦係交涉事宜陝甘督臣左宗棠前在閩浙總督任內創議船政上年冬間曾經奏明去閩之後遇有船局陳奏事件仍由沈葆楨會銜等語該大臣等素辦洋務尚以大局為重應請一併

飭下通籌合算詳細酌覈權今日之時勢為未雨之綢繆專摺密陳覈計本年十二月即英約前期六箇月先行的改之期各該將軍督撫大臣務於十一月內奏到以便臣衙門再行妥議請

旨遵行

諭軍機大臣等。總理各國事務衙門奏。據籌修約事宜。請飭濱海沿江通商口岸地方將軍督撫大臣各行所見一摺。前因原議十年修約。為期已近。據該衙門奏請飭南北洋通商大臣。於熟悉洋務各員中。每處選派二員。於十月各送來京。當經降旨允准。惟前奏止欲於選派各員內。收羣策羣力之效。而於通盤大局尚待籌商。咸豐十年換約後。原因中國財力不足。不得不勉事羈縻。而各國詭謀請託。百出嘗試。尤屬防不勝防。轉瞬換約屆期。彼此互相要約。羣起交爭。或多方脅制。以求暢達所欲。均屬意中之事。值此時勢。惟謹恃筆舌以爭之。此外別無可恃。各

該將軍督撫大臣受國厚恩當此外患方殷亟應合力齊心先
事圖維為未雨綢繆之計著曾國藩李鴻章都興阿英桂劉長
佑吳棠瑞麟李瀚章崇厚郭柏蒼劉坤一李福泰馬新貽丁寶
楨曾國荃蔣益澧通盤籌畫左宗棠沈葆楨籌辦船政事宜於
洋務尤有關係並著悉心酌覈妥籌速奏本年十二月卽英約
前期六箇月先行的改之期各該將軍督撫大臣務於十一月
內奏到毋稍延緩俟總理衙門密函條說寄到時諸臣其審時
度勢妥籌萬全以濟時艱而副委任詳細覆奏毋得徒託空言
原摺著鈔給閱看

總理衙門信函

夷務之興數十年矣。其始中外隔越。未能洞達情勢。議戰議和。迄未能了。迨後歧途百出。一誤再誤。以至於今。將欲曲突徙薪。又恐投鼠忌器。是今日所處之勢。乃極險之勢。今日所值之時。乃極難之時。不待智者而後知也。泰西各國。僻處海外。其先散而無統。不過一島夷耳。自有輪船輪車而遠者可近。近者可遠。互相要約。居然一列國也。其人嗜者。利其人所好者。兵器械精良。心志堅韌。互相吞併。居然一戰國也。況海濱之波濤未息。山陬之游徼紛來。如西藏、安南及西北各邊界。皆英、法、俄等國與我陸路相通。極為注意者。溯我

朝議開海禁之初

天威震疊外洋懾服其時西人之來者甚少輪船輪車之制未備五印度新嘉坡香港上海煙臺等處之要路未據不能聯絡聲勢諸凡有備故尚帖然及至今日彼之勢已合而不能遽離彼之勢已強而不能遽弱而我獨以離且弱者當之於事曷克有濟然彼雖不能遽離而可離之機自在彼雖不能遽弱而可弱之勢仍在特患無人焉統籌全局因其勢力均敵而導之使離因其谿壑難盈而制之使弱此中沈幾觀變大有權宜遇事設施須中要害苟或時有未可勢有未能無妨暫時羈縻而臥薪嘗膽養精蓄銳以待

異日之自強固非空言道德所能談笑而卻兵戎亦非徒抱殷憂所能涕泣而銷禍患溯自庚申之變根本重地事機閒不容楚各省雖能仗義勤王均屬緩不及事

京師內外類多遷避逃亡其膽識較優守而弗去者熟察事機均以不早定約見責甚且滿漢大臣聯銜封奏文函載違星夜疊催令早換約彼時不得不參酌輿論保全大局自議款以來明知留此條約根株易啟爭辯其為時迫勢偏倉卒未能盡善在所必然而不能不用此示信以默求制馭之方所有不得已苦衷諸君子諒共鑒之茲因修約屆期業將籌議緣由縷晰

上達而意有未盡。且有不必豫行宣露者。因撮舉大要。具函布陳。尚祈宏展。許謨廣求。方略必如何。而後可不決。勢必如何。而後決裂亦無所畏。慮周思密。事乃有成。至修約時。必來爭執各端。奏明另備條議寄覽。不難據理直指其事之不可行。難在籌策。使其事之可不行。此中竅要。並乞逐加詳酌。實事求是。弗貴空談。務於仲冬望閒。奏鈔以便與同列公商。幸勿遲誤。是所切禱。

總理衙門條說

一議請

觀自古兩國修好。使臣入覲。載入史冊。具有典章。迨至宋時。儀節

無不變易未可為訕我

朝

聖祖仁皇帝

高宗純皇帝

召見外國使臣震懾

天威罔不警懾嘉慶年間英使來朝未克成禮而罷咸豐十年與各國換約英法皆請呈遞國書照會數次竟以儀節未定事不果行今以

皇上沖齡

兩宮

皇太后垂簾聽政因之停罷彼卽以阻其入

覲為不以客禮相待時來覲言多憤激雖曾以如欲請

覲必須行跪拜禮為說彼卽堅稱並非屬國不能改從中華儀節而終不肯謂

覲可不行皆韓昌黎原道曰孔子之作春秋也諸侯用夷禮則夷之夷而進於中國則中國之今夷並未自進於中國而必以中國之禮繩之其勢有所不能若權其適中者而用之未卜彼之能否聽從而本衙門亦不敢主持獨創此議第不許入

覲我實無辭究應如何惟希公同商酌

一議遣使西洋諸國自立約後遣使互駐。交相往來各處皆然而中國則並無此舉。曩據各使臣來請奏派前往本衙門以各國至中華通商傳教有事可辦故當遣使我中國並無赴外國應辦之事無須遣使駁之。第十餘年來彼於我之虛實無不洞悉我於彼之情偽一概茫然。兵家知彼知己之謂何而顧不一慮。及且遇有該國使臣倔強任性不合情理之處惟有正言折之而不能向其本國一加詰責。此尤隔閡之大者。顧中國出使外國其難有二。一則遠涉重洋人多畏阻。水陸跋涉寓館用度費尤不貲。且分駐既多籌款亦屬不易。一則語言文字尚未通曉仍須倚

繙譯未免為難况為守兼優才堪專對者本難其選若不
得其人貿然前往或致狎而見侮轉足貽羞域外誤我事
機甚或勉強派遣至如中行說之為患於漢尤不可以不
慮上年本衙門奏准令斌椿帶同學生鳳儀等附船赴泰
西各處游歷略訪其風俗人情與出使不同未可再為仿
照此後遣使一節亦關緊要未可視為緩圖究應如何亦
希公商酌定

一議銅綫鐵路此二事俄使創論於前英法美接踵於後
哢哢再四不辨不休彼但知往來迅疾於貿易大有裨益
是以同心一意求之甚切持之甚堅本衙門先以失我險

阻害我田廬妨礙我風水為詞肆駛彼悍然不顧本衙門
又以占我民間生計勢必羣起攘臂相抗眾憤難當設或
勉強造成被民間拆毀官不能治其罪亦不能責令賠償
彼則以自能派人看守防禦為詞抵執現因條約未載此
事如羅星塔吳淞口等處英人私設電綫民因不便而毀
之洋商欲於上海租地界內修造鐵路蘇松太道應寶時
舉七不可以折之尚未激成釁端若明歲更議條約彼必
互相要結強欲增入約內斷非空言所能禁阻應若何先
事規畫臨事折衝俾其不便請行以杜後患之處有地方
之責者請共商之

一議內地設行棧內河駛輪船凡通商口岸條約載有一
定地方歷年如祁門縣安甯州以及通州海口峽石鎮張
家口向不通商之處私開行棧層見疊出歷經禁阻至輪
船欲進內河壅斷居奇必致華船生計日蹙且內河窄狹
華船易遭碰碰尤屬顯而易見上年法國欲令小輪船駛
入內河經本處按約照會禁止曾累向各國反復辯駁並
告以必欲設行內地駛船內河凡有華民鮮不從此失業
中國官員理應保護且失業之後鋌而走險商賈豈能復
通彼則以內地若有此項行棧船隻民間趨利無患其不
允從卽如現行海上輪船所用華人多於洋人卽其明證

本衙門又以洋人徧行內地難於約束必須一切抽釐輸稅無異華商遇有洋人不法之事亦按華民一律辦理彼更堅執不允相持日久迄未定議來歲換約各國得尺則尺得寸則寸必來爭論彼時更難情導理喻應如何設法以伐其謀請共商之

一議販鹽挖煤查通商章程善後條約第三款內地食鹽係在禁例近來各國拖帶鹽船之案不一而足英則有鄭士真法則有彌樂納美則有本吉以及兆豐行士吉行華記行皆曾犯禁雖經被獲議罰漏網尚多各國公使無不包庇商人此時限以條約尚且疊次私販將來換約勢必

竭力爭添至開挖煤窰欲將自然之利供彼貪婪上年湖
廣大軍山有洋商在彼開石尋煤經本衙門照會英公使
飭令禁止又福建稅務司美理營欲租臺灣雞籠山開採
煤石亦經彼處紳民稟請嚴禁兩事雖已照辯論內地行
棧輪船之吉斤駁而利在必爭根株依然未斷來年換約
定為首先饒舌之一端如何制令不行亦希公商

一議開拓傳教自議款以來傳教已奉明文欲於此時禁
止勢萬難行按照法國條約第十三款及上年通行諭單
行事一則曰循規蹈矩一則曰不得絲毫干預地方公事
果能謹守尚屬無妨乃各省恃為護符而教士一味袒庇

甚且從旁扛幫描誦與地方官為難聽之不可治之不能
地方官申詳上司咨達本衙門照會伊國公使冀令懾服
殊不知該公使與傳教士並非統屬不能徑行其令且亦
多方迴護並藉外省未結案件未還教堂等事與本衙門
爭論幾於唇焦舌敝未克遂漸挽回復思天主教之入中
國與佛道二家相等若照僧道設官以治之未始非權變
之策而究竟不無流弊且今天下以引入天主教為口
實更屬非宜抱人心風俗之憂而存補偏救弊之念者惟
有平日聯絡紳民陽為撫循而陰為化導或啟其誤或破
其奸是亦不禁之禁也有何良策並祈公商

恭親王等又奏再臣衙門添設同文館招考天文算學一事○業於本年五月二十日○在臣衙門將投考各員局試酌取三十一名○當經具奏○並將試卷進呈在案○惟思所取各員○僅長於中國文理○而於西文西語未嘗學問○即使所延洋人○亦通中國語言文字○究恐講解尚多隔閡○因查同治二年二月暨三年七月○升任江蘇巡撫李鴻章奏請仿京師同文館之例○在上海設立外國語言文字學館○臣衙門奏覆廣東開設教習外國語言文字學館○俱經聲明○如有精通西文西語才識出眾者○調京考試○授以官職○均蒙俞允行○令遵照在案○茲查上海廣東兩處所設學館○已閱三年○其

中子弟所學。卽或未能深粹。而通其語言文字者。諒不乏人。臣衙門開館伊邇。若於該學生中。擇其已有成效者。咨送來京考試。與臣衙門本年所考各員。共為講解。必可得加應請。

旨飭下上海通商大臣。兩廣總督。廣東巡撫。將各該處所立外國語言文字學館內。擇其已有成效者。每省酌送數名來京考試。以便羣相研究。俟有成效。果係才識出眾。卽由臣等酌請。

獎勵。授以官職。俾資鼓舞。

御批依議。

戊辰呼圖克圖棍噶扎拉參奏竊於八月十六日接准
欽派赴俄收攬伊犁官兵署伊犁將軍榮全差派佐領鄂勒墜圖
由俄持文來咨查得呼圖克圖帶領兵丁於七月初三日
由原營起程揆度此時可早抵哈達烏蘇惟沿途官兵好
從管束萬一所屬人向哈薩克另生事端關繫甚重或此
時可抵巴克圖地方紮營之時相隔哈薩克甚近更加留
心早將此事善為辦成以慰

聖座等情紮帶兵西進原以迎接收攬俄國伊犁官兵而塔城已
失哈薩克賊在附近盤踞塞占道路適遇在途不得不為
剿除鄂勒墜圖稱該員由途見聞前經剿殺逃散之哈薩

克均已奔往俄境等情是以咨各行俄官古畢那吐爾將
逃往之哈薩克賊全行逐出俄境相應請

旨飭下總理各國事務衙門轉飭俄國將滋事奔往之哈薩克賊
逐出該國境界若哈薩克竟奔該國暫避一時日後不免
復來滋事若徑跟跡窮追當俄國之哈薩克攬混實難分
辨恐其有傷於彼反釀成禍謹將辦理情形恭摺具奏

御批該衙門知道

咨行俄官文

大清國

欽命統帶塔爾巴哈台等處兵勇呼圖克圖為咨行大俄國管理

西斜岡畢爾那托爾查辦事。呼圖克圖蓮

吉帶兵西進會商伊犁將軍營迎接貴國境內收攬之索倫等官
兵人。於七月二十六七等日行至察汗鄂博烏蘭布拉
吐木爾綽爾和等處。哈薩克遊牧甚多。該哈薩克擁眾來
犯。呼圖克圖當即帶兵擊散。未克追及。此係塔爾巴哈台
起事。正賊僥竄入貴國交界。即請為念兩國二百餘年
和好之情。趕緊逐出。為此各行。

庚午總理各國事務恭親王等奏。竊照義大利亞國使臣
阿爾明雍。上年來京。由法國繙譯官李梅代懇議立條約。
並經阿爾明雍照會通商大臣崇厚。由崇厚奏經臣衙門

議照換約各國成案一律覈辦具奏欽奉

諭旨○派臣譚廷襄會同崇厚與之辦理○臣譚廷襄遵卽與該公使議定條約五十五款○於上年九月十八日○公同畫押蓋印○約內聲明以一年為期○或在天津○或在上海互換○當經臣等奏蒙

聖鑒在案○旋於本年五月十八日○接據崇厚來函內稱○法國領事德微理亞面稱義國新公使現已到滬○交出該使臣致臣譚廷襄並崇厚洋信一件○詳出漢文○係為換約之事○內有○如可通融在京互換○該使深為樂從等語○查與條約不符○可否照日斯巴尼亞國辦法先行請

旨將條約發下俟其前來卽與互換經臣等以向來各國換約係由各該使臣呈遞照會據情具奏請

派大臣互換奉有

諭旨卽將條約咨送內閣用

寶交派出之員祇領辦理此次義國公使意欲來京換約函內加可否二字是其不敢遽行進京已可概見應卽辦一覆信言明用

寶交下後卽可在天津互換以符原約並屬該使接信後繕具照會以便咨明辦理等情函覆崇厚去後嗣由崇厚函覆並將擬答該使信彙寄商繕發茲於本年九月十七日接據

崇厚函稱初十日法國領事交來義國公使洋字文件譯
稱該公使擬於九月間赴滬即可在彼豫備換約數與原
約所載或在上海之議相符該使既稱九月間赴滬諒此
時業經前往自應查照比國換約成案辦理臣等擬請就
近在江蘇巡撫江蘇布政使二員內

簡派一員赴滬與該國公使接晤將上年所立條約互換如蒙
俞允卽由臣衙門知照內閣按照歷次成案將義國漢洋字合訂
條約二本恭用

御寶發交三口通商大臣崇厚遣寄江蘇交
派出之員祇領辦理

諭軍機大臣等。總理各國事務衙門奏義大利亞國換約屆期請派員互換一摺。義大利亞國前立條約聲明一年互換。現據該國公使呈遞照會內稱。擬於九月間赴滬。即可在彼換約。請派員前往上海會辦等語。該公使現已到滬。應即將條約互換。著派丁日昌將上年與義大利亞國所立條約妥為互換。其條約各本俟崇厚派員齎送至江蘇時。即著丁日昌祇領。屆期前往上海辦理。並著軍機處將此次寄諭摘錄一併發往。如該使索看憑據。即可給與閱看。俟換約事畢。此旨仍繳還軍機處備查。總理各國事務衙門摺一件著鈔給閱看。

辛未三。口通商大臣兵部左侍郎崇厚奏天津原練槍隊

出師日久甫經調回必得加意講求認真考覈並據督練
官總兵王佐臣總教官副將銜英人薄朗訪有前隨戈登
打仗得力之美國人巴非於步隊礮隊頗能熟悉等責成
王佐臣薄朗延約巴非教練步隊給予薪金將來可與馬
隊礮隊合操方能聯為一氣至步隊礮隊中如有不得力
者革除技藝出眾者亦應隨時鼓勵擬請每隊每月准給
公費銀八兩作為獎賞辦公之需

御批知道了。

戊寅總理各國事務恭親王等奏竊臣衙門於本年九月
二十日准軍機處交出呼圖克圖棍噶扎拉參具奏現與

赴俄大員咨商勦除哈薩克並請照會俄使各等因一摺
並鈔錄行俄官咨文單一併奉

旨該衙門知道欽此臣等伏查摺內所敘榮全咨文意主於撫該
呼圖克圖意主於勦彼此所稱均不為無見惟哈薩克向
分數種良莠不齊其甘心倡亂者自應勦除淨盡以絕根
株其安分營生者尤宜加意撫恤以資蕃息至於首鼠兩
端陽為順從而居心叵測者誅之既不勝誅撫之亦非易
撫更宜多方駕馭以示羈縻查上年九月榮全奏稱逆回
變亂時哈薩克等幫同回匪戕害人民擄掠物件東山哈
薩克等尚屬照常安靜榮全曾用善言面勸安慰東山一

帶哈薩克之心令其轉諭南北山各哈薩克一體安分毋蹈前轍我

國家法外施仁必不深究爾等之罪等語此次棍噶扎拉參所稱塔爾巴哈台起事正賊現皆逃避俄境或卽係榮全所稱首先從逆肆行剽掠之眾此等頑民固屬法無可貸臣等業已據情照會俄使轉咨古畢爾那托爾將此項滋事之哈薩克全行逐出其肯允爲照辦與否雖未可知惟其中或有被脅愚民如榮全所稱曾經面屬尚可悔罪投誠者若一概剿除終恐良莠不分以絕其更新之路鋌而走險勢將倚俄境爲負隅追之則逸縱之復來而於西疆

軍務轉難收拾臣等公同商酌請

旨飭下西路統兵大臣麟興李雲麟等迅即查明逃往俄境之哈薩克是否均係塔爾巴哈台起事正賊抑另有別項哈薩克裹脅在內亟宜轉飭棍噶扎拉參分別懲辦總期恩威並用勦撫兼施以仰體我

國家殲厥渠魁宵從罔治之意方為上策榮全現在俄境攬難民於各哈薩克情形諒必較為熟悉其應勦應撫機宜該呼圖克圖帶兵西進之時自可與之會商以冀和衷共濟

諭軍機大臣等總理各國事務衙門奏請飭西路統兵大臣分別

勦辦事宜一摺塔爾巴哈台回匪滋事哈薩克曾助該匪戕害
人民擄掠物件現在逃赴俄境榮全前給棍噶扎拉參咨文意
主於撫而該呼圖克圖前奏請飭俄國將哈薩克逐出意主於
剿惟該哈薩克向分數種良莠不齊自應分別勦撫不得將安
分及被脅之人一概誅戮致令鋌而走險羣起抗拒叢生枝節
現在總理各國事務衙門業已照會俄使轉咨古畢爾那托爾
今將此項滋事之哈薩克全行逐出著麟興榮全李雲麟等迅
即查明是否均係塔爾巴哈台起事正賊抑另有別項哈薩克
裏脅在內務須轉飭棍噶扎拉參分別懲辦不可率意徑行鹵
莽從事榮全前在俄境於各哈薩克情形較為熟悉所有勦撫

機宜並著傳知該呼圖克圖與之妥籌商辦總理各國事務衙門原摺並著鈔給麟興等閱看

給俄國照會

為照會事同治六年九月二十日准統帶塔爾巴哈台等處兵勇呼圖克圖棍咨稱茲因帶兵西進會商伊犁將軍營迎接俄國境內收攬之索倫等官兵人口於七月二十六七等日行至察汗鄂博烏蘭布拉吐木爾綽爾和等處哈薩克遊牧甚多該哈薩克擁眾來犯呼圖克圖當即帶兵擊散未克追及此係塔爾巴哈台起事正賊此時均已奔往俄境暫避一時之急日後不免復來滋事若徑跟跡

窮追與俄國之哈薩克提混實難分辨除咨行俄國管理
西斜固畢爾那托爾查辦外並請照會俄國住京大臣轉
行俄國邊界官趕緊將哈薩克賊全行逐出等因前來查
哈薩克人眾良莠不齊此項塔爾巴哈台起事搶刦之哈
薩克自應痛加勦洗以昭懲創現在逃避貴國境內未便
越境追剿日後復來滋擾勢所必然且此等頑民留在貴
國境內亦足以貽貴國之患相應照會貴大臣篤念兩國
和好之誼轉咨固畢爾那托爾速將此項滋事之哈薩克
人眾全數逐出以免在貴國境內貽害是為至要

新辨夷務始末卷之五十